

礪山宋氏誌狀錄

序

家有狀猶國有史大小不齊其揆一也若無文獻之徵國之治亂家之興替蒙然不知使後學面墻而立豈勝慨歎哉惟我礪宋自貞烈公后分爲四派子姓繁衍遍在八域功勳忠義之臣博學宏德之士接踵繼承炳垂竹帛昭著家乘可以謂東方盛族也越在己未族丈伴竹堂諱鍾岱諱鍾原德谷諱以浩紹述先世墓誌與行狀而尚多闕矣族人基龍考證麗鮮史氏之所記廣詢宗族先賢之文稿四家遺狀合爲三冊壺山若礪文其有徵真吾宋承先裕後之良箴也將爲重刊請余以弁卷噫源深而流遠根固而枝茂理之常也礪山氏之自麗朝以來每多忠孝德行而無一亂臣逆子者莫非先世篤行修善之効也浸梓之後置於几案上有時閱覽祖先之事蹟言行瞭然在目孝悌之心油然而興作矣非徒爲齊家之貽謨亦有補於風化之萬一云爾甲戌仲春下澣後孫宋榮淳謹序

舊序

惟我礪宋亦足以稱數於東方也自麗氏中葉迄于今幾百載而勳名輔相忠

臣孝子騁芳趾美奕世冠冕子子承承孫孫緜緜枝分派及教成風化觀感於家而德業自成淵源於祖而行義兼備明顯而有厚國澤民之賢側陋而有孝親潔身之儒然而京鄉各處親疎分殊若無文獻之足徵則何以知誰家幾世有名臣幾代有賢類乎吾宋自上世派分已多苟欲合之爲一則事巨力綿族孫鍾岱鍾原以浩甫開論於宗中收議於京鄉同心協力以誌狀及行義事實集爲一冊以爲來許子姓觀感之資其意可尚噫珠璣之澤澤水自潤玉蘊之山山光猶媚則吾宋之自國初以來每多忠勳孝烈而尚無橫逆不道者其非各家先世行義篤實之效耶余嘗懼吾宗先賢事實愈久而愈失其傳也此編幸成實叶本志雖在他人之有一二微行者猶欲其見聞况我宗族之有德業者乎是編之作非徒爲一家之美庶亦爲永世風化之一助云崇禎紀元後四己未五月下澣後孫嘉善大夫原任成均館大司成宋持養謹序

親親之仁尊賢之義自古昔聖賢皆以爲天命之所敎而人道之建立者也德既盛於裕後寔藉積累之基孝莫大於尊祖敢闕揄揚之典竊惟我礪宋粵自麗氏中葉迄于國朝以來七百有餘載然名公之勲業賢儒之道德阜比之淵源忠孝之烈節譜不絕書奕世冠冕者皆輿論然也而迄今滄桑變嬗子姓繁衍舊牒易紊傳聞難的非文獻之足徵不幾於杞宋之典乎此吾姓所以誌狀錄之設也粵在己未族丈伴竹堂諱鍾岱諱鍾原德谷諱以浩以知申公派誌狀事實獨付剞劂而刻之者實在乎事巨力綿之致然大宗之未能普合也文獻之未能兼脩也後承之恨因有所極何幸吾宗四派公議詢同復自先祖之豐功盛德歷至苟顯之懿行偉蹟用石印而工告訖於是乎前牒之所未徧者今則備焉各派之所自私者今則公焉好事之作蓋有待而然歟若余之不佞既屬以校讐之役竊有感焉願讀此編者覽誌蹟而起肅敬之心考言行而激貧懦之志然後以究其至理所在而折衷焉則庶幾學明行尊果能達先祖之事此其所以裕後之德也揄揚之典也諸宗蓋各勉旃乎我時甲戌三月下浣盤谷後孫宋持衡謹跋